

17.oktober 2019

UKA2019/35

Naalagaaffiit Peqatigiit (NP) Meeqqat pillugit Isumaqatigiissutaata tamarmiusup Kalaallit Nunaanni tamarmi atuutsinneqarlernissaa anguniarlugu aammalu Meeqqat Illersuisuata inassuteqaataanut matumunnga aalajangiiffigisassatut siunnersuummut naammassinnittumik ingerlaasissamik Naalakkersuisut suliaqaqqullugit peqquneqarnissaannik Inatsisartut aalajangiiffigisassaattut siunnersuut. (Siumup Inatsisartunut ilaasortaatitai)

Siumut-minngaaniit tupinnanngitsumik siunnersuut taperseripput aammalu nuannaarutigippit oqaatigissuarput.

Siumup pingaartitarivaa aamma pingaartittuassavaa meeqqat tamakkiisumik illersorneqartuarnissaat qullersaqarfinningaaniit, taakuummatami siunissamik uagut ingerlatsinitsinni nangitseqqittussaasut.

Siumut pingaartippaa meerartatta ersittumik pitsaasumillu pimoorunneqartumik illersorneqartuarnissaannik oqariartortuarnissaq. Ullutsinnimi meerartagut erligalugit pinngikkutsigit tamatsinnut akisuumik kinguneqarsinnaanera takorloorneqarsinnaasoq tamatta nalunngilluinnarlugu ilisimaarinnguatsiarparput.

Siumut-miit nuannaarutigalugu oqaatigissuarput nunatsinni peqatigiiffiit inuinnaallu meerartatta pitsaasumik atugaqarnissaannut tamaaviaarussillutik ingerlatsisimasut, nukinnillu annertuunik atuilluarsimasut, uummammit pisumik qutsavigerusukkatsigit.

Tassa meeraq meeqqatut nuannaarluni illersorneqarsinnaalluni maani nunatsinni inooqataanissaanik, siunissamilu qularnaarlugu tamatta tasioqatigiilluta sulissutiginera suli nangeqqissavarput, aamma Siumut-miit tamanna suli piareersimalluta peqataaffigissavarput.

Taamatut Siumut-miit oqaaseqarluta siunnersuut tamakkiisumik taperserlugu ataatsimiititaliamut susassaartumut ingerlateqqipparput.

Mala Høy Kuko

Siumut